

Izveštaj sa 35. sjednice Općinskog vijeća Ilijaš

35. sjednica Općinskog vijeća Ilijaš održana je 24. novembra 2015. godine sa 13 tačaka dnevnog reda. Sjednicu je vodio Predsjedavajući Općinskog vijeća Ilijaš g. Damir Filipović, a na samom početku sjednice u okviru tačke vijećnička pitanja i inicijative usvojen je Zaključak vijećnika Stranke za Srednje g. Gljiva Besima, da se uputi prijedlog Ministarstvu rada i socijalne politike Kantona Sarajevo da obezbijedi prehrambene pakete građanima Općine Ilijaš koji se nalaze u stanju socijalne potrebe, a koji zbog udaljenosti nisu u mogućnosti dolaziti po obrok koji priprema narodna kuhinja.

Na trećoj tački dnevnog reda usvojen je Zaključak kojim Općinsko vijeće Ilijaš daje ovlaštenje Općinskom načelniku da dodijeli javna priznanja i odlikovanja Općine Ilijaš za prethodnu kalendarsku godinu povodom Dana Općine.

Najvažnija tačka koja se našla na današnjoj sjednici Općinskog vijeća zasigurno je nacrt Budžeta Općine Ilijaš za 2016. godinu, prema kojem ukupno planirani prihodi i rashodi za 2016. godinu iznose 11.364.300,00 KM.

Naime, procijenjeni prihodi i primici u okviru projekcije Nacrta Budžeta Općine Ilijaš za 2016. godine planirani su u skladu sa važećim propisima koji definišu i određuju pripadnost javnih prihoda općina, uvažavajući sve aktivnosti koje se sa aspekta aktuelnih fiskalnih mjera provode na višim nivoima vlasti, kao i njihova refleksija na Budžet Općine Ilijaš. Planirani prihodi nacrtom Budžeta za 2016. godinu su za 7% viši u odnosu na plan prihoda za 2015. godinu.

Nacrt Budžeta Općine Ilijaš za 2016. godinu stavlja se na javnu raspravu u trajanju od 20 dana, počev od 27.11.2015. godine do 18.12.2015. godine.

Na ovoj sjednici vijećnici su podržali i Odluku o izvršavanju Budžeta Općine Ilijaš za 2016. godinu kao i Prijedlog Odluke o davanju saglasnosti Općinskom načelniku za sklapanje Ugovora o osnivanju prava služosti na zgradi JU "KULTURNO-SPORTSKI CENTAR I RADIO ILIJAŠ" u korist titulara prava stvarne služnosti JP "Hrvatske telekomunikacije" d.d. Mostar, radi postavljanja opreme GSM bazne stanice na fasadi i krovu zgrade.

Na sedmoj tački dnevnog reda našao se Prijedlog Odluke o imenovanju dva člana Općinske izborne komisije Ilijaš, prema kojoj se u Općinsku izbornu komisiju imenuju g. Velid Fazlić i g. Sanja Cvijan na mandat od 7 godina.

Vijećnici su podržali i Odluku o prodaji jednosobnog stana u ulici 126. ilijaške brigade u površini od 27 m². Prodaja će se izvršiti licitacijom, a početna cijena stana iznosi 899,20 KM, Odluku o načinu i uslovima prodaje licitacijom poslovne zgrade i zemljišta uz zgradu koja se nalazi u Srednjem u površini od 322 m², te Odluku o načinu i uslovima prodaje neizgrađenog građevinskog zemljišta u državnom vlasništvu putem javnog nadmetanja radi izgradnje proizvodno-poslovnog objekta u obuhvatu Industrijske zone "Luka". Maksimalna površina objekta 7490,00 m², spratnosti objekta P+4. Početna prodajna cijena iznosi 25,00 KM/m².

Usvojena je i Odluka o izmjenama i dopunama Odluke o utvrđivanju raspona cijena za neizgrađeno građevinsko zemljište prema zonama građevinskog zemljišta u Općini Ilijaš za 2015. godini kojom se određuje cijena neizgrađenog građevinskog zemljišta od 25,00 KM/m² u Industrijskoj zoni "Luka".

Usvojena su pojedina Rješenja iz imovinsko-pravne oblasti.

Informacija o stanju privrede, poljoprivrede i samostalnog privređivanja u kojoj je prikazano detaljno stanje privrede, stanje u oblasti samostalnog privređivanja, ekonomski razvoj, stanje u oblasti poljoprivrede, podsticajne mjere i realizovani projekti primljena je k znanju.